

Na osnovu člana VI(4) Ustava FBiH ("Službene novine FBiH", broj 1/94,13/97 i 52/02),Odluke o proglašenju Amandmana CIII i Amandmana CIV na Ustav FBiH ("Sl.novine FBiH" br.20/04), člana 75. Ustava Zeničko-Dobojskog kantona ("Službene novine Federacije BiH", broj 7/96), člana 6.Zakona o osnovama lokalne samouprave ("Službene novine Federacije BiH", broj 6/95),člana 22.Zakona o lokalnoj samoupravi kantona("Službene novine ZE-DO kantona", broj 13/98) i člana 26.Statuta Općine Doboj Jug ("Službeni glasnik Općine Doboj Jug", broj 3/99),Općinsko vijeće Doboj Jug na svojoj dvanaestoj sjednici IV saziva održanoj dana 20.09. 2005.godine,donosi

S T A T U T OPĆINE DOBOJ-JUG

I - OPĆE ODREDBE

Član 1.

Ovim Statutom u skladu sa Ustavom i Zakonom bliže se uređuju pitanja samoupravnog djelokruga Općine,organizacija,ovlašćenja i način rada organa Općine,oblici učešća građana u odlučivanju o lokalnim poslovima,osnivanje i rad mjesnih zajednica,finansiranje i imovina Općine,javnost rada i druga pitanja od značaja za ostvarivanje lokalne samouprave.

Član 2.

Općina Doboj-Jug (u daljem tekstu:općina) je teritorijalna jedinica lokalne samouprave na području Zeničko-dobojskog kantona na kojoj građani ostvaruju lokalnu samoupravu u poslovima utvrđenim Ustavom,Zakonom i Statutom općine.

Član 3.

Granice općine utvrđene su federalnim zakonom i drugim federalnim propisima.
Općina obuhvata područje slijedećih naselja :Matuzići i Mravići
Područje,naziv,sjedište kao i promjena granica Općine utvrđuje se Zakonom uz predhodno izjašnjenje Općinskog vijeća.

Član 4.

Općina ima svojstvo pravnog lica.Službeni naziv Općine je Općina Doboj Jug. Sjedište općine je u naseljenom mjestu Matuzići.

Član 5.

Općina ima svoj grb a može imati i zastavu kao i druge simbole o kojima posebnom odlukom odlučuje Općinsko vijeće.
Sadržaj i oblik grba i drugih obilježja i način korištenja utvrđuje se Odlukom Općinskog vijeća.

Član 6.

Općinsko vijeće,Općinski načelnik i općinske Službe za upravu imaju pečat čiji je oblik i sadržaj regulisan posebnom Odlukom Općinskog vijeća u skladu sa Zakonom.
Pečat je okruglog oblika i sadrži tekst ispisan latinicom u koncentričnim krugovima:
Bosna i Hercegovina,Federacija Bosne i Hercegovine,Zeničko-dobojski kanton,Općina Doboj Jug,te naziv organa.U sredini pečata je grb općine .

Član 7.

Službeni jezici u općini su bosanski , hrvatski i srpski jezik.
Službeno pismo je latinica I ćirilica.
Ostali jezici se mogu koristiti kao sredstvo komunikacije i nastave.

Član 8.

Značajan datum za općinu je:
- 21.mart - Dan općine .

II – SAMOUPRAVNI DJELOKRUG OPĆINE

Član 9.

Općina je samostalna u odlučivanju u poslovima iz samoupravnog djelokruga,u skladu sa Ustavom, Zakonom i ovim Statutom,a podliježe upravnom nadzoru koji obavljaju nadležni organi Kantona.

Član 10.

Općina u okviru samoupravnog djelokruga:

1. Osigurava uslove za poštivanje i zaštitu ljudskih prava i osnovnih sloboda u skladu sa Ustavom;
2. Osigurava lokalne potrebe stanovništva u oblasti brige o djeci,obrazovanja i vaspitanja, insormisanje,rada i zapošljavanja,socijalne zaštite,kulture,fizičke kulture i sporta,zaštita životinja, bilja i čovjekove okoline,ako Zakonom nije drugačine određeno;
3. Preduzima mjere za osiguranje higijene i zdravlja ljudi,u skladu sa Zakonom;
4. Osigurava sigurnost ljudi i imovine i upravlja općinskom imovinom;
5. Donosi budžet i propise o oporezivanju i na drugi način obezbjeđuje potrebno finansiranje koje nije obezbjedila kantonalna ili federalna vlast;
6. Vodi urbanističku politiku od značaja za općinu i njen razvoj;
7. Upravlja javnim dobrima lokalnog značaja uz saglasnost Savjeta MZ-a ;
8. Osigurava korištenje i upravlja lokalnim građevinskim zemljištem u skladu sa Zakonom uz saglasnost Savjeta MZ-a;
9. Osigurava uvjete rada lokalnih radio i TV stanica,u skladu sa Zakonom;
10. Vodi brigu o turističkim resursima općine;
11. Osigurava vođenje evidencije o ličnim stanjima građana i biračkim spiskovima;
12. Osigurava uspostavljanje i održavanje premjera i katastra zemljišta,u skladu sa Zakonom;
13. Obavlja upravne poslove iz samoupravnog djelokruga općine;
14. uređuje i druga pitanja,u skladu sa Ustavom i Zakonom.

III- ORGANI OPĆINE

Član 11.

Organi Općine su:

1. Općinsko vijeće
2. Općinski načelnik

Član 12.

1. OPĆINSKO VIJEĆE

Općinsko vijeće je predstavničko tijelo građana općine koje samostalno donosi općinske propise i druge akte u okviru prava i dužnosti Općine, iz samoupravnog djelokruga Općine, te obavlja i druge poslove u skladu sa Ustavom, Zakonom i ovim Statutom.

Član 13.

Općinsko vijeće ima 12 vijećnika čiji mandat traje 4 godine.
Izbor vijećnika vrši se na način i po postupku utvrđenim Zakonom.

Član 14.

Općinsko vijeće nadležno je za slijedeće poslove:

1. priprema i usvaja Statut općine;
2. donosi odluke, druge propise i opće akte i daje njihovo tumačenje;
3. donosi Poslovnik o svom radu;
4. bira i smjenjuje predsjedavajućeg Vijeća i njegovog zamjenika, sekretara i članove radnih tijela Vijeća;
5. donosi budžet i izvještaj o izvršenju budžeta i usvaja završni račun na prijedlog Općinskog načelnika;
6. donosi program razvoja za pojedine djelatnosti za koje je nadležno;
7. donosi propise o općinskim taksama i na drugi način osigurava potrebna finansijska sredstva u skladu sa Zakonom;
8. osniva javna preduzeća i javne ustanove i druga pravna lica za obavljanje privrednih, društvenih, komunalnih i drugih djelatnosti od interesa za općinu;
9. raspisuje referendum;
10. raspisuje javni zajam i samodoprinos i odlučuje o zaduženju općine;
11. donosi propise o organizaciji i osniva službe uprave;
12. utvrđuje naziv za dijelove naseljenog mjesta;
13. odlučuje o inicijativama za davanje i izmjenu naziva ulica, trgova, mostova i dr.;
14. donosi odluke o oblicima i načinima saradnje sa drugim općinama.

Član 15.

Organizacija rada Općinskog vijeća detaljnije se uređuje Poslovníkom o radu Općinskog vijeća.

Član 16.

Rad Općinskog vijeća je javan. Općinsko vijeće može odlučiti da određena pitanja, izuzetno razmatra bez prisustva javnosti.

Član 17.

Općinsko vijeće može punovažno odlučivati ako sjednici prisustvuje natpolovična većina od ukupnog broja vijećnika. Vijeće odlučuje natpolovičnom većinom glasova od ukupnog broja vijećnika u Vijeću. Općinsko vijeće usvaja Statut Općine dvotrećinskom većinom izabраниh općinskih vijećnika. Budžet, izvještaj o izvršenju budžeta, Poslovnik o radu Vijeća, izbor i razrješenje predsjedavajućeg, zamjenika predsjedavajućeg Vijeća, Općinsko vijeće donosi natpolovičnom većinom ukupnog broja vijećnika.

Član 18.

Prva sjednica Općinskog vijeća, u novom sazivu, će biti održana najkasnije 30 dana nakon objavljivanja rezultata izbora.

Član 19.

Prvu sjednicu Općinskog vijeća u novom sazivu, saziva predsjedavajući prethodnog saziva Općinskog vijeća ili njegov zamjenik i njome predsjedava do izbora novog predsjedavajućeg Općinskog vijeća. Ako predsjedavajući Općinskog vijeća prethodnog saziva ili njegov zamjenik ne sazove konstitutivnu sjednicu u roku iz prethodnog stava, sjednicu će sazvati najstariji vijećnik novog saziva.

Član 20.

Na prvoj sjednici Općinskog vijeća vrši se izbor predsjedavajućeg, zamjenika predsjedavajućeg ili sekretara Vijeća.

Član 21.

Općinsko vijeće tajnim glasanjem bira predsjedavajućeg Općinskog vijeća, osim u izuzetnim situacijama o čemu će se u konkretnom slučaju izjasniti Općinsko vijeće, a na osnovu konsultacija sa političkim strankama koje imaju svoje vijećnike u Vijeću.

Lista kandidata, odnosno prijedlozi za imenovanje iz stava 1. ovog člana sadrže najmanje po dva kandidata za svaku funkciju.

Izbor Općinskog načelnika vrši se neposredno na općinskim izborima, a u skladu i po proceduri Zakona o direktnom izboru Općinskog načelnika u FBiH

Član 22.

Predsjedavajući predstavlja Općinsko vijeće i predsjedava sjednicama Općinskog vijeća.

Mandat predsjedavajućeg i zamjenika predsjedavajućeg traje do isteka mandata vijećnika.

Predsjedavajući i zamjenik predsjedavajućeg Općinskog vijeća svoju dužnost obavljaju volonterski.

Član 23.

Sekretar Općinskog vijeća obavlja svoju dužnost na način predviđen Poslovníkom o radu Općinskog vijeća.

Član 24.

Općinski vijećnici za svoj rad u Općinskom vijeću imaju pravo na naknadu u skladu sa Odlukom Općinskog vijeća.

Član 25.

Nespojive su funkcije Općinskog načelnika, sekretara Vijeća i rukovodećih službenika koje je imenovao Općinski načelnik, sa funkcijom Općinskog vijećnika.

Član 26.

Poslovníkom o radu Općinskog vijeća regulišu se pitanja koja se odnose na prava i obaveze vijećnika, njihovu odgovornost, postupak sazivanja prve sjednice Vijeća i njegovog konstituisanja, potvrđivanja mandata izabranih vijećnika, način izbora predsjedavajućeg, njegova prava i obaveze, polaganje svečane izjave, postupak sazivanja sjednica Vijeća, utvrđivanje dnevnog reda, održavanje reda na sjednici, utvrđivanje rezultata glasanja, ovlašteni predlagači sazivanja sjednica, postupak donošenja općinskih propisa, izvještavanje javnosti o sjednici, donošenje programa rada Vijeća, radna tijela Vijeća, njihov sastav, nadležnost i način rada, sadržaj i način vođenja zapisnika o radu sjednice vijeća i druga pitanja od značaja za organizovanje i rad Općinskog vijeća.

2. OPĆINSKI NAČELNIK

Član 27.

Općinski načelnik je izvršno-upravni organ Općine koji se bira neposredno na općinskim izborima na način utvrđen Zakonom i ovim Statutom.

Općinski načelnik svoju dužnost obavlja profesionalno.

Član 28.

Mandat Općinskog načelnika traje koliko i mandat vijećnika u Općinskom vijeću i ne može biti biran na tu funkciju više od dva puta uzastopno.

Član 29.

Ukoliko mjesto Općinskog načelnika ostane upražnjeno izbor novog Općinskog načelnika vršit će se u skladu i po proceduri Zakona o direktnom izboru Općinskog načelnika u FBiH.

U slučaju spriječenosti Općinskog načelnika privremeno mijenja predsjedavajući Općinskog vijeća ili vijećnik kojeg izabere Općinsko vijeće u skladu sa članom 11. Zakona o direktnom izboru Načelnika.

Član 30.

Općinski načelnik u obavljanju poslova iz samoupravnog djelokruga Općine nadležan je da:

1. provodi općinsku politiku, priprema prijedloge koje razmatra Vijeće, izvršava općinske propise i opće akte i izvršava poslove prenesenih ovlaštenja Općini od strane Kantona;
2. imenuje i smjenjuje općinske službenike i namještenike u skladu sa Zakonom;
3. stara se o organizaciji općinske uprave i njenom radu;
4. rukovodi radom općinskih službi i općinskih službenika;
5. osigurava saradnju općinskih službenika sa ombudsmenima;
6. podnosi izvještaje Općinskom vijeću i javnosti o provođenju općinske politike i svoje aktivnosti;
7. obavještava Skupštinu Kantona, odnosno kantonalne organe o izvršavanju kantonalne politike i kantonalnih zakona i drugih propisa, kao i o stanju u odgovarajućoj oblasti kad je izvršenje te politike i tih zakona povjereno Općini;
8. vrši i druge poslove određene ovim Statutom i općinskim propisima.

Član 31.

Poslove iz prethodnog člana Općinski načelnik vrši samostalno i putem službi za upravu u sastavu jedinstvenog općinskog organa uprave i ostalih općinskih službi.

3. OPĆINSKE SLUŽBE ZA UPRAVU

Član 32.

Za obavljanje upravnih stručnih poslova iz samoupravnog djelokruga Općine, kao i za obavljanje upravnih i stručnih poslova koji su federalnim Zakonom i Zakonom kantona preneseni na Općine, osnivaju se općinske službe za upravu.

Općinske službe za upravu osniva Općinsko vijeće svojom Odlukom na prijedlog Općinskog načelnika.

Odlukom o osnivanju općinskih službi za upravu uređuju se pitanja koja se odnose na naziv, broj nadležnost, rukovođenje, odgovornost i način rada općinskih službi za upravu.

Član 33.

Radom općinskih službi rukovodi Općinski načelnik, koordinira i usmjerava njihov rad sa svim ovlaštenjima, obavezama i odgovornostima utvrenim Zakonom, ovim Statutom i drugim općinskim propisima.

Radom pojedinih općinskih službi za upravu neposredno rukovodi rukovodilac službe koji je za svoj rad i rad službe kojom rukovodi odgovoran Općinskom načelniku.

Rukovodioce općinskih službi imenuje Općinski načelnik u skladu sa Zakonom o državnoj službi, te Pravilnikom o unutrašnjoj organizaciji organa uprave.

Član 34.

U ostvarivanju poslovne uprave i samouprave utvrđenih Zakonom općinske službe za upravu u okviru svoje nadležnosti prate stanje u oblastima za koje su obrazovane, a naročito provođenje utvrđene politike, izvršavanju i obezbjeđenju izvršenja Zakona, odluka, drugih propisa i općih akata, prate stanje i pokreću inicijative za rješavanje pitanja u oblastima za koje su obrazovane, rješavaju u upravnim stvarima, vrše upravni nadzor i druge upravne poslove, pripremaju propise i vrše stručne i druge poslove za Vijeće i Općinskog načelnika.

IV- OBLICI UČEŠĆA GRAĐANA U ODLUČIVANJU

Član 35.

Građani sa područja općine, mogu neposredno da učestvuju u odlučivanju o lokalnim poslovima samoupravnog djelokruga Općine:

- referendum
- mjesnim zborovima građana
- građanskom inicijativom i
- drugim oblicima.

Član 36.

1. Referendum

Građani sa područja općine mogu putem referenduma neposredno odlučivati o pitanjima koja su od njihovog zajedničkog interesa kao što su:

1. osnivanje nove mjesne zajednice;
2. zavođenje samodoprinosu za cijelu općinu, mjesnu zajednicu;
3. predlaganje donošenja akata o pitanjima koja su od interesa za život i rad građana kao što je: izgradnja objekata komunalnog značaja, uređenje prostora, održavanje higijene i čistoće javnih površina na području općine, uvođenje samodoprinosu za određene namjene i druga pitanja od zajedničkog interesa za građane;
4. izjašnjavanje građana o pitanjima od općeg interesa za općinu, ako Općinsko vijeće zatraži takvo izjašnjenje;
5. druga pitanja predviđena Zakonom ili propisom Općine.

Član 37.

Pravo glasanja na referendumu imaju građani koji imaju stalno mjesto boravka na području općine, odnosno na području za koje se raspisuje referendum, koji imaju biračko pravo i koji su upisani u birački spisak.

Odluka donesena na referendumu koji je proveden za područje cijele općine obavezna je za Općinsko vijeće.

Postupak održavanja referenduma propisuje Općinsko vijeće odlukom o raspisivanju referenduma u skladu sa Zakonom.

Član 38.

Prijedlog za raspisivanje referenduma mogu podnijeti:

- jedna trećina vijećnika Općinskog vijeća;
- Općinski načelnik;
- mjesne zajednice o čemu odluku donose Savjeti mjesnih zajednica.

2. Mjesni zbor građana

Član 39.

O svakom pitanju iz samoupravnog djelokruga Općine građani mogu raspravljati na Zboru građana, te predlagati način rješavanja određenog pitanja, odnosno donošenje akata iz djelokruga Općine i Općinskog vijeća.

Član 40.

Građani na Zboru donose zaključke, daju inicijative, prijedloge, mišljenja i usaglašavaju stavove o ostvarivanju svojih prava i interesa.

Član 41.

Zbor građana saziva predsjednik Savjeta mjesne zajednice po sopstvenoj inicijativi ili na prijedlog udruženja građana i drugih organizacija i zajednica sa područja mjesne zajednice.

Građani na mjesnom zboru mogu inicirati i organizovanje poslova koji neposredno utiču na svakodnevne potrebe života i rada građana kao što su:

- izgradnja i održavanje puteva, kanalizacije, vodovoda i drugih komunalnih potreba i infrastrukture,
- uređenje naselja, izgradnja i uređenje parkova, dječijih igrališta, sportskih i drugih objekata,
- zaštita okoline i slično.

Član 42.

Građani na zboru biraju radno Predsjedništvo. Radno predsjedništvo se sastoji od predsjedavajućeg i dva člana. Radno predsjedništvo rukovodi radom Zbora.

Član 43.

Zbor građana održava se po potrebi. O radu Zbora vodi se zapisnik, koji sadrži mjesto i vrijeme održavanja Zbora, broj prisutnih, dnevni red, zaključke, prijedloge i stavove koje Zbor donosi.

Da bi se Zbor građana mogao održati potrebno je da Zboru građana prisustvuje 10% građana koji imaju biračko pravo, a da bi Zbor mogao punovažno raditi, potrebno je da se za zaključak, prijedlog, mišljenje, inicijativu ili stav izjasni natpolovična većina od prisutnih na Zboru. Ukoliko se prvi i drugi puta zboru građana ne odazove 10% građana, članove savjeta bira Općinsko vijeće.

3. GRAĐANSKA INICIJATIVA

Član 44.

O svakom pitanju iz djelokruga Općinskog vijeća građanin može pokrenuti raspravu putem građanske inicijative.

Član 45.

Općinsko vijeće dužno je razmotriti građansku inicijativu i donijeti o njoj zaključak u roku od 60 dana od dana dostave inicijative.

V- MJESNA ZAJEDNICA

Član 46.

Mjesnu zajednicu, kao oblik učestvovanja građana u odlučivanju o poslovima od neposrednog interesa građana, odlukom osniva Općinsko vijeće.

Odlukom o osnivanju mjesne zajednice utvrđuje se naziv, sjedište, teritorija, mjesna područja mjesne zajednice i druga pitanja.

Član 47.

Mjesna zajednica se osniva za jedno naseljeno mjesto, više međusobno povezanih manjih naselja ili za dio većeg naselja koje u odnosu na ostale dijelove čini zasebnu razgraničenu cjelinu.

Član 48.

Postupak osnivanja mjesne zajednice ili promjene njenog područja pokreće se podnošenjem inicijative.

Inicijativu za osnivanje-izdvajanje-pripajanje i spajanje mjesne zajednice, odnosno promjenu njenog područja mogu dati:

- građani na Zboru građana,

- Općinsko vijeće,
- Općinski načelnik.

Inicijativa iz stava 1.ovog člana dostavlja se Općinskom vijeću u pismenom obliku sa detaljnim obrazloženjem u pogledu područja za koje se predlaže osnivanje mjesne zajednice,način osnivanja i razloge zbog kojih se predlaže osnivanje.

Član 49.

U postupku po pokrenutoj inicijativi za osnivanje mjesne zajednice razmatra se da li postoje uslovi,da se u mjesnoj zajednici čije se osnivanje predlaže,mogu obezbjediti uslovi da građani samostalno odlučuju o ostvarivanju svojih zajedničkih interesa i potreba i o njihovom solidarnom zadovoljavanju u oblastima: uređenja naselja,stanovanja,komunalnih djelatnosti,dječije i socijalne zaštite,zdravstvene zaštite,obrazovanja,kulture,fizičke kulture,tehničke kulture,stvaralaštva, zaštite i unapređenja čovjekove okoline i drugim oblastima života i rada građana.

Član 50.

Ako Općinsko vijeće zauzme stav da postoje opravdani razlozi za osnivanje nove mjesne zajednice prihvaćena inicijativa se potvrđuje donošenjem odluke koju dostavlja Zboru građana na čijem području treba da se osnuje nova mjesna zajednica radi raspisivanja referenduma.

Član 51.

Za osnivanje mjesne zajednice referendumom se izjašnjavaju građani koji žive na području za koje se osniva mjesna zajednica.

Odluka o osnivanju mjesne zajednice prihvaćena je ako je na referendumu za odluku glasala natpolovična većina birača upisanih u birački spisak naseljenih mjesta za čije se područje osniva mjesna zajednica.

Na osnovu izjašnjavanja građana na referendumu, Općinsko vijeće donosi odluku o osnivanju mjesne zajednice.

Član 52.

Mjesna zajednica ima svojstvo pravnog lica u pogledu prava i obaveza utvrđenih zakonom i ovim Statutom.

Član 53.

Organi mjesne zajednice su: Zbor građana i Savjet mjesne zajednice.

Savjet MZ broji 7 članova . Prilikom izbora članova osigurati srazmjernu zastupljenost prema broju birača u pojedinom naselju i dijelu naselja. Članovi Savjeta MZ biraju se direktnim prijedlozima na zboru građana ili na prijedlog političkih partija koje participiraju u Općinskom vijeću i to javnim izjašnjavanjem na zboru građana.

Organi MZ se konstituišu 60 dana nakon općinskih izbora shodno rezultatima izbora za Općinsko vijeće.

Član 54.

Stručne i administrativno tehničke poslove za potrebe organa mjesne zajednice obavlja sekretar mjesne zajednice kojeg bira Savjet MZ . O načinu njegovog angažmana odlučit će Savjet MZ ovisno o raspoloživim sredstvima i obimu posla.

Nespojiva je funkcija sekretara mjesne zajednice sa funkcijom člana Savjeta.

Funkciju predsjednika Savjeta MZ i Sekretara MZ ne mogu obavljati građani iz iste podružnice MZ.

Član 55.

Sredstva za zadovoljavanje potreba i interesa građana u mjesnoj zajednici obrazuju se od:

1. sredstava građana koju oni udružuju putem samodoprinosa ili na drugi način,
2. naknada za usluge i drugih prihoda koje svojim aktivnostima ostvaruje mjesna zajednica.,

3. prihoda Općine koji se ustupaju mjesnoj zajednici u skladu sa razojnim i drugim mogućnostima, kao i sa planom razvoja mjesne zajednice,
4. poklona i drugih sredstava.

Član 56.

Nadzor nad zakonitošću rada organa mjesne zajednice obavlja Općinski načelnik neposredno i preko općinskih službi za upravu.

Općinsko vijeće na prijedlog Općinskog načelnika može u slučaju nerada ili nezakonitog rada, raspustiti izabrane organe mjesne zajednice ili naložiti izbor novih organa.

Do provođenja novih izbora, ali ne duže u roku od 90 dana do dana raspuštanja poslove organa mjesne zajednice obavljat će povjerenik koga odlukom o raspuštanju organa imenuje Općinsko vijeće.

VI- SARADNJA SA DRUGIM OPĆINAMA I UDRUŽENJEM OPĆINA

Član 57.

U obavljanju poslova iz samoupravnog djelokruga, općina ostvaruje saradnju sa drugim općinama, a prvenstveno sa susjednim općinama.

Saradnja iz stava 1. ovog člana, planira se i ostvaruje prije svega poslovima koji su od njihovog zajedničkog interesa.

Saradnju sa drugim općinama, shodno odredbama stava 1. i 2. ovog člana ostvaruje Općinsko vijeće, odnosno Općinski načelnik, svaki u pitanjima iz svog djelokruga.

Član 58.

Općina može pristupiti međunarodnim udruženjima lokalnih zajednica i sarađivati sa odgovarajućim lokalnim jedinicama drugih država, u skladu sa Ustavom Federacije i federalnim zakonom.

Odluku o pristupanju udruženjima, odnosno ostvarivanju saradnje iz stava 1. ovog člana donosi Općinsko vijeće.

VII- FINANSIRANJE I IMOVINA OPĆINE

Član 59.

Općina ima budžet u kome se iskazuju prihodi i rashodi.

Budžet se izrađuje na način predviđen Zakonom i donosi se za jednu kalendarsku godinu.

Po isteku godine, za koju je budžet donesen, sastavlja se izvještaj o izvršenju budžeta. O izvršenju općinskog budžeta neposredno je odgovoran Općinski načelnik.

Ukoliko se godišnji budžet za narednu godinu ne može donijeti prije početka godine za koju se donosi, vrši se privremeno finansiranje i to najduže za period od tri mjeseca.

Odluku o privremenom finansiranju donosi Općinsko vijeće u skladu sa Zakonom, na prijedlog Općinskog načelnika.

Član 60.

Općini pripadaju prihodi utvrđeni Zakonom, kao i sredstva za obavljanje prenesenih poslova iz okvira prava i dužnosti Kantona.

Član 61.

Općina samostalno raspolaže приходima koji joj pripadaju i može se zaduživati i zaključivati ugovore o kreditu, o čemu odlučuje Općinsko vijeće.

Član 62.

Općina ima u vlasništvu nepokretnu i pokretnu imovinu. Imovinom u vlasništvu Općine mora se upravljati brižno u skladu sa Zakonom i drugim propisima.

VIII- AKTI OPĆINE

Član 63.

Općinsko vijeće u izvršenju poslova iz svoje nadležnosti donosi: Statut, općinske propise, budžet, završni račun i izvještaj o izvršenju budžeta, Poslovnik o radu Općinskog vijeća, zaključke, daje autentična tumačenja propisa koje donosi i utvrđuje njihov prečišćen tekst. Poslovníkom o radu Općinskog vijeća bliže se utvrđuje sadržaj i način pripremanja i donošenja općinskih propisa i drugih akata Općine i način njihovog objavljivanja. Propisi i opći akti organa Općine moraju biti u skladu sa Ustavom, Zakonom i ovim Statutom.

Član 64.

Načelnik općine u izvršavanju propisa i općih akata iz samoupravnog djelokruga Općine, donosi opće akte (naredbe, pravilnike i uputstva) i pojedinačne akte kojima se rješava o pravima, obavezama i pravnim interesima fizičkih i pravnih lica u I stepenu.

Član 65.

Protiv prvostepenih rješenja i zaključaka Općinskog načelnika, organa i tijela Općinskog vijeća, donesenih na osnovu propisa Općinskog vijeća i Općinskog načelnika u drugom stepenu po žalbi, rješava drugostepeni organ za žalbe, kojeg osniva Općinsko vijeće. Pri donošenju rješenja i drugih akata iz prethodnog člana primjenjuju se pravila upravnog postupka utvrđena Zakonom o upravnom postupku.

Član 66.

Općinski načelnik u prenesenim poslovima kantonalne uprave rješava u upravnim stvarima u prvom stepenu. Protiv upravnih akata Općinskog načelnika iz prethodnog stava u drugom stepenu rješava nadležno kantonalno Ministarstvo.

IX- JAVNOST RADA

Član 67.

Rad organa Općine i mjesnih zajednica je javan, kao i drugih organa samoupravnog djelokruga općinskih organa i institucija.

Član 68.

Svaki građanin općine ima pravo da bude informisan o radu općinskih organa i donesenim odlukama i drugim općim aktima, od strane tih organa.

Informisanje javnosti o radu organa Općine vrši se naročito kroz:

- javno održavanje sjednica Općinskog vijeća,
- informisanje javnosti o radu općinskih organa putem sredstava javnog informisanja od strane ovlaštenih predstavnika,
- objavljivanje propisa i akata u "Službenom glasniku Općine Doboj Jug".

Općina obezbjeđuje javnost rada u postupku donošenja odluka, uključivanjem javnosti, odnosno omogućavanjem građanima da neposredno učestvuju u postupku donošenja i odlučivanju, a u skladu sa Zakonom i Statutom Općine.

Član 69.

Transparentnost rada Općine ostvaruje se kroz otvorenost postupka realizacije općinskih propisa i akata, primjenu Zakona i drugih propisa, te kroz upoznavanje javnosti sa njihovom primjenom. Transparentnost se obezbjeđuje kroz slobodu pristupa informacijama i informisanja javnosti, objavljivanje izvještaja o budžetu i drugih akata, putem sredstava javnog informisanja i vlastitog informacionog sistema, izdavanje informativnog biltena i druge oblike informisanja.

Član 70.

Pravo na iznošenje informacija o radu Općinskog vijeća, pored predsjedavajućeg ima i lice koga posebno odredi Vijeće.

Načelnik općine ima pravo na informisanje javnosti o svom radu i radu općinskih službi, a može posebno ovlastiti određena lica za davanje informacija.

X- PRIJELAZNE I ZAVRŠNE ODREDBE

Član 71.

Svi propisi i opća akta općinskih organa kao i državnih organa i pravnih lica moraju biti usklađeni sa odredbama ovog Statuta najkasnije u roku od 60 dana od dana stupanja na snagu ovog Statuta.

Član 72.

Stupanjem na snagu ovog Statuta prestaje da važi Statut općine Doboj Jug ("Sl. glasnik Općine Doboj Jug", broj 3/99).

Član 73.

Ovaj Statut stupa na snagu danom objavljivanja u "Službenom glasniku Općine Doboj Jug".

**BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINA DOBOJ JUG
OPĆINSKO VIJEĆE**

Predsjedavajući Vijeća:

Škiljo dr Hasan

Broj: 01-05-1-1633-1/05

Dana: 22.09.2005.godine